



**Proposta de Programa de
Goberno do BNG para o
Concello de Ribeira
2019/2023**

ÍNDICE

1. RIBEIRA CON EMPREGO	4
2. RIBEIRA XUSTA E ACCESIBLE	5
3. RIBEIRA BEN COIDADA	12
4. RIBEIRA VERDE.....	11
5. QUE AS PARROQUIAS CONTEN	15



Xosé Antonio Vázquez Cobas, candidato á alcaldía: “devolverémoslle a voz á xente”

Tes nas túas mans as liñas xerais do programa de goberno do Bloque desde o convencemento de que chegou a hora do cambio. É o momento de apostar por unha organización na que se pode confiar, como é o BNG. **Queremos que a xente participe con nós no goberno e estea orgullosa de ser ribeirense.**



RIBEIRA COAS IDEAS CLARAS

No BNG témolo claro. Somos conscientes de que Ribeira precisa deixar de lado as políticas de improvisación, malgasto e amiguismos. Van xa demasiados anos nos que o Partido Popular gobernou de costas á veciñanza, impondo obras que nada teñen a ver coas necesidades de Ribeira, esquecendo por completo a existencia das parroquias e paralizando a actividade económica e social da cidade.

Por iso vos presentamos este [Programa de Goberno para o Concello de Ribeira 2019/2023](#), que nace dun proceso transparente e participativo, co aval de estar baseado nunha práctica política que xa ten demostrado os seus froitos, e que aspira a transformar Ribeira nun concello do que todas e todos nos sintamos orgullosos, que solvente as necesidades básicas das persoas e que mellore a calidade de vida da veciñanza. Ese é o noso compromiso.

Fronte á parálise económica na que o PP sumiu o concello –boa mostra é a cantidade de comercios pechados nos últimos anos, ou os 0 m² de chan industrial que se crearon–, dende o BNG propoñemos unha **RIBEIRA CON EMPREGO**. A nosa prioridade absoluta será a de abordar estratexias dirixidas a recuperar o dinamismo económico e a creación de emprego. Para iso, levaremos as seguintes medidas encamiñadas a contribuír ao desenvolvemento económico de Ribeira e a fortalecer o tecido comercial e empresarial propio:

- [Remunicipalizaremos o aparcadoiro da praza do Centenario e crearemos estacionamentos gratuítos](#) con bo firme, iluminación e seguridade.
- Promoveremos a creación dunha [bolsa de alugueiro de baixos comerciais](#).
- Modernizaremos e dotaremos de servizos o Polígono Industrial de Xarás.
- Rebaixarémolles impostos a empresas e autónomos que xeren emprego estábel e con condicións dignas.
- Crearemos bolsas de prácticas para investigación que freen o éxodo de persoas moza.
- Apostaremos firmemente pola creación de chan industrial para evitar a fuga de máis empresas.

Dinamizaremos tamén os sectores produtivos, especialmente o mar, motor económico do noso concello mediante medidas como as seguintes:

- Designaremos a [Concellería do Mar](#) e a crearemos un [Consello Sectorial de Mar](#) que de verdade teña voz na política de Ribeira.
- Demandaremos de Portos de Galiza o acondicionamento dos portos e un plan de mantemento e seguridade anual.

- Crearemos un **selo de calidade** para os produtos da nosa ría, que lles dea a visibilidade que merecen.

Tamén con vistas a xerar emprego velaremos por un modelo turístico sustentábel, social, respectuoso co territorio e desestacionalizado, para o cal fortaleceremos a Oficina Municipal de Información Turística, e crearemos unha rede de roteiros culturais, naturais e históricos, encadrados nun **Plan de Turismo Activo**. Este plan incluírá ofertas de turismo alternativas como saídas pola ría en barcos pesqueiros ou visitas guiadas a puntos de interese do concello.

Sabemos que Ribeira é máis que unha rúa peonil, por iso **recuperaremos e potenciaremos festas e tradicións populares que lle dean vida e contido cultural a máis rúas e prazas do concello**, e poñeremos en valor barrios esquecidos polo Partido Popular, como é Bandaorrío, o verdadeiro casco histórico de Ribeira.

O goberno do BNG manterá o **24 de xullo, día da Dorna**, como festivo local. Asemade prestará todo o apoio institucional posible para a organización e difusión da Festa da Dorna.

En definitiva, dende o BNG impulsaremos e dinamizaremos a economía local para atinxir un modelo de crecemento económico sustentábel.

Queremos tamén unha **RIBEIRA XUSTA E ACCESIBLE**, que avance en proxectos positivos para a veciñanza, como é o **Plan de Transporte Público**, proposta de éxito que partiu do BNG, e que melloraremos coa inclusión do dereito ao transbordo, a gratuidade para persoas coa pensión máis baixa e persoas desempregadas de longa duración, a mellora das frecuencias e liñas e a sinalización das paradas, entre outras medidas.

No marco deste Plan de Transporte faremos as xestións necesarias para promover a recuperación dun **Noite-Bus** que comunique as parroquias co centro urbano en horario nocturno, especialmente en días destacados como o Martes de Entroido, Ano Novo, festas do verán ou Festa da Dorna. Ademais, esixiremos da Xunta a recuperación do Noite-Bus comarcal, para achegar as localidades próximas ao ocio nocturno ribeirense.

Ademais, o Plan de Transporte do BNG incluírá as xestións necesarias ante as Administracións competentes para mellorar as condicións dos autobuses, como poden ser calefacción, aire acondicionado ou melloras na accesibilidade, para garantir a plena mobilidade de toda a veciñanza en igualdade.

Xestionaremos, diante do Estado e da Xunta, a realización dun estudo de viabilidade para dotar á comarca ata Ribeira dunha **liña de tren**, contribuíndo así á mobilidade da veciñanza e a mellorar as comunicacións comerciais e industriais.

Seguiremos a traballar, coma nos últimos anos, na dirección de conseguir espazos públicos de calidade, accesibles e seguros.

Deseñaremos [rutas escolares seguras](#) tanto no centro de Ribeira como nas parroquias, para fomentar o desprazamento a pé de crianzas ata as escolas e para mellorar a fluidez do tráfico nas horas de entrada e saída das aulas.

Tamén impulsaremos o cumprimento da [Lei Galega de Accesibilidade Universal](#) e [suprimiremos as barreiras arquitectónicas e sensoriais](#) en todo o concello, buscando a plena inclusión de todas as veciñas e veciños.

Elaboraremos un plan municipal coa colaboración de asociacións e organizacións para identificar as necesidades da veciñanza con diversidade funcional e garantiremos a inserción social e laboral, de lecer e de actividade física ou deportiva.

Ademais, promoveremos a creación de vivendas tuteladas e vivendas de respiro familiar, para poden conciliar o traballo de atención a persoas dependentes.

No BNG entendemos que protexer as persoas que máis o precisen debe ser unha prioridade. Sabemos que no noso concello hai moitas necesidades e que debemos traballar para acabar con elas, mais fronte ao malgasto en propaganda, publicidade e proxectos sen sentido do actual goberno, nós [comprometémonos firmemente co departamento de Servizos Sociais](#), asegurando un aumento progresivo desta partida orzamentaria, ata conseguirmos un concello xusto socialmente onde ninguén quede atrás.

Con isto poderemos atender todos os casos de pobreza extrema e axudar á veciñanza en risco de exclusión social. Ampliaremos o Servizo de Axuda no Fogar e promoveremos a creación da [Tarxeta +](#), con descontos para persoas de máis de 65 anos en exposicións, cine, actos deportivos...

Ademais, será prioridade do BNG velar porque as empresas fornecedoras de servizos básicos (auga, luz, gas) non deixen a ningunha veciña ou veciño sen servizo por incapacidade de pago.

E fronte ás políticas de privatización do Partido Popular, quen pretenden regalarlle a residencia de maiores de Ribeira a unha empresa privada, no BNG traballaremos para [crear unha residencia da terceira idade 100% pública](#).

Queremos [unha Ribeira xusta e igualitaria, onde as mulleres nos sintamos seguras](#).

O BNG ten na súa esencia política a defensa dos dereitos das mulleres e a loita por unha sociedade verdadeiramente igualitaria. Nese empeño levamos investido moitos esforzos e conquistado moitos obxectivos. Mais tamén constatamos que ningún dereito está asegurado se non se defende cada día e, dado que é moito o que falta por conquistar, é preciso dar novos pasos para conseguir novos avances.

Por iso é fundamental unha política activa dende o concello que confronte o patriarcado, que defenda os dereitos das mulleres, que esixa mudanzas xurídicas e sociais, que denuncie a permisividade e as irracionais actuacións xudiciais, que implique a sociedade (especialmente a mocidade) na loita pola igualdade e que despregue a súa propia programación para conquistala. Para acadar isto, levaremos a cabo medidas como as seguintes:

- Impulsaremos actuacións dirixidas a garantir o acceso e a permanencia das mulleres no traballo en condicións de igualdade.
- Fomentaremos a mellora das condicións laborais en sectores de emprego feminizados.
- Instaremos ás empresas a garantir a non discriminación por razón de sexo e darémoslle prioridade á contratación de empresas con cláusulas sociais e condicións dignas de traballo
- Crearemos a [Concellaría de Igualdade](#), que será a encargada de planificar e coordinar as políticas municipais en materia de xénero, en colaboración co tecido asociativo e cos foros de mulleres.
- Impulsaremos foros de mulleres, como o Consello das Mulleres ou a Consello das Mulleres Novas.
- [Favoreceremos a conciliación](#) e a corresponsabilidade da vida persoal, laboral e familiar, con medidas como a [creación de puntos de atención continua, comedores e outras actividades](#).

En definitiva, integraremos a perspectiva de xénero nas políticas municipais e abordaremos de maneira integral a violencia de xénero, para loitar contra o crime que representa a máxima expresión da desigualdade e dominación masculina, buscando rachar co modelo actual de socialización sexista e avanzando así nun modelo de relacións simétricas.

Queremos que Ribeira sexa [un concello con futuro](#), por iso declaramos o noso firme compromiso cun ensino público de calidade e coa prestación de servizos útiles para as familias. Queremos que as crianzas de Ribeira medren seguras nun concello que lles aporte o necesario para o seu desenvolvemento na sociedade. Neste sentido:

- [Acondicionaremos o entorno da Escola Infantil Municipal](#) para garantir a seguranza das crianzas e da súa familia eliminando barreiras arquitectónicas e instaurando un camiño seguro, dotado de beirarrúas en todo o traxecto.
- Atenderemos nas mellores condicións a crecente demanda de prazas derivada da elevada natalidade.
- Reclamámoslle á Xunta que asuma as súas competencias para solucionar os problemas de escolarización e masificación das aulas en educación primaria e secundaria.

- Elaboraremos un plan de mantemento dos centros de educación infantil e primaria, revisando as instalacións para a súa conservación: pintura, sumidoiros, acondicionamento de xardíns e patios, etc.
- Dotaremos dos fondos necesarios as bolsas de comedor, estudo, transporte e conservatorio para que as posibles dificultades das familias non impidan o acceso á educación das e dos ribeirenses.
- Dinamizaremos o [Consello Escolar Municipal](#), no que participarán e serán consultados os diferentes axentes que interveñen no ensino no ámbito do Concello, estudará a súa problemática e orientará as actuacións prioritarias a desenvolver.
- Comprometémonos a construír unha [Biblioteca Municipal](#) dotada con todos os servizos necesarios para que sexa de utilidade á veciñanza: sala de lectura, servizo de préstamo, sala de estudo, ludoteca, sala dixital...

Ademais, queremos que crianzas, mocidade e veciñanza en xeral teñan unha [oferta cultural, de ocio e deportiva](#) ben planificada, diversificada e accesible, que non discrimine por razón de clase ou lugar de residencia. Por iso, desde o BNG traballaremos nas seguintes medidas:

- Colaboraremos coa Xunta para garantir a oferta en todos os centros de actividades extraescolares gratuítas, facilitando o uso das instalacións deportivas e culturais municipais.
- Promoveremos programas municipais de educación dirixidos aos escolares: coñecemento do patrimonio natural, histórico, etnográfico ou artístico do concello, funcionamento dos servizos, avances tecnolóxicos... para que Ribeira sexa un espazo educador os 365 días do ano.
- Os centros públicos serán utilizados fóra do horario lectivo para cumprir un obxectivo social máis amplo: actividades culturais, deportivas, educativas, sociais, aproveitamento das bibliotecas escolares...
- Deseñaremos unha programación cultural estábel ao longo do ano e que integrará programacións específicas en relación co patrimonio inmaterial (ciclo do maio, os magostos, a muiñada...), a música galega, o coñecemento do noso patrimonio histórico-cultural, o verán, o Nadal, o entroido, o Día das Letras Galegas e as celebracións tradicionais (como as romarías de Santo Alberte ou San Roque).
- Fomentaremos o asociacionismo cultural e a súa participación a través do Consello Municipal de Cultura: na xestión das infraestruturas existentes, na programación cultural, na coordinación das actividades...

- Adecentaremos e darémoslle contido á Casa da Xuventude para convertela nun espazo verdadeiramente útil para a mocidade.
- Acondicionaremos locais de ensaio para grupos musicais, con equipos de gravación de maquetas e ciclos de concertos en directo.
- Impulsaremos o teatro afeccionado coa Escola Municipal de Teatro readaptando espazos municipais para o teatro.
- Crearemos a Escola Municipal de Música, con aulas musicais de diferentes niveis.
- Potenciaremos a autoorganización da mocidade, asesorando e impulsando a constitución de asociacións xuvenís, de tal xeito que a creación de tecido asociativo xuvenil permita a constitución dun Consello Municipal da Mocidade.
- Elaboraremos un e Plan de Ocio e Tempo de Lecer que implique a posta en marcha de actividades nocturnas na fin de semana coa creación de actividades alternativas (deportivas, culturais, lúdicas) que permitan diversificar o ocio en xeral e o nocturno en particular.
- Crearemos unha Factoría Xuvenil que permite e potencia as inquietudes artísticas (escritura, música, artes plásticas, novas tecnoloxías) da mocidade de Ribeira.

Concretamente, na área de [deportes](#) as liñas de acción política do BNG terán como núcleos vertebradores a escola, os clubs de base, o deporte federado, o deporte recreativo e os eventos deportivos. Neste sentido, desenvolveremos as seguintes medidas:

- Propiciaremos campañas de animación ao deporte nas escolas, xornadas de práctica deportiva para tomar contacto cos diferentes deportes, así como competicións deportivas entre os distintos centros de ensino secundario.
- Na política de axudas primaremos o [modelo educativo-deportivo](#) (diversificación deportiva, normalización lingüística, superación da discriminación de sexo) e o traballo máis que os resultados.
- Demandaremos das administracións supramunicipais o apoio necesario a estes clubs.
- Facilitaremos o uso das instalacións deportivas municipais, realizando un censo das instalacións deportivas públicas municipais para optimizar o seu uso.
- Propiciaremos o asesoramento necesario para a formación de monitoras e monitores, persoal directivo, árbitras e árbitros... para un mellor desenvolvemento do deporte de base en Ribeira.

- Fomentaremos as **Escolas Deportivas Municipais**, coorganizadas cos clubs ou con asociacións deportivas de clubs de base, para o cal crearemos o correspondente Consello Municipal de Deportes.
- Solicitaremos das administracións supramunicipais a axeitada dotación e mantemento das infraestruturas deportivas de propiedade municipal, utilizadas polo deporte federado non de elite.
- Estableceranse convenios de colaboración cos clubs federados orientados á dinamización social e á implicación dos clubs na vida municipal.
- Asinaremos convenios cos clubs de elite para a promoción do deporte entre a poboación escolar, por medio de visitas a centros educativos, charlas, xornadas... ou para facilitar o acceso ás competicións deportivas.
- Promoveremos o **deporte recreativo** para mellorar o estado físico e de saúde da veciñanza, organizando competicións de carácter popular ou xornadas de deporte na rúa. Ademais, impulsaremos campañas de sensibilización sobre os aspectos positivos da práctica do deporte, así como un Programa de fomento do deporte para persoas maiores.
- Elaboraremos propostas de diversas **actividades no medio natural**, como programas de camiñada, circuítos populares ou roteiros.
- Potenciaremos os deportes náuticos e o turismo deportivo como medida de xerar colaboracións cos clubs locais e dinamizar a economía.” e “- Traballaremos para que Ribeira sexa cidade que albergue competicións de ámbito galego e estatal.

No BNG cremos que as veciñas e veciños merecen unha **RIBEIRA BEN COIDADADA**. Sabemos que ao Partido Popular lle gusta facer obras e logo esquecerse delas, deixando parques, paseos ou mobiliario urbano podre e esmorecer, e impedindo que a veciñanza poida facer uso do equipamento público.

Fronte a esta práctica de malgasto de cartos públicos, dende o BNG comprometémonos a levar a cabo as seguintes medidas:

- Elaboraremos un **plan plurianual de conservación de rúas e beirarrúas**, que garanta o mantemento tanto das calzadas como das beirarrúas e das gabias, evitando así que sempre que chegue o inverno se asolaguen rúas, vivendas e comercios.
- Desenvolveremos un **plan de conservación de parques e xardíns**, así como das instalacións deportivas do concello, que será levado a cabo pola brigada de obras e servizos e que garantizará

tanto o bo estado do mobiliario como a seguraza das crianzas e da veciñanza. Paralela e paulatinamente, desenvolveremos un [plan de modernización de parques infantís](#) segundo as necesidades de cada un, adaptándoos tamén a nenos a nenas con diversidade funcional, e pulando por [crear parques cubertos](#) para que poidan ser utilizados todo o ano. Ademais, velaremos porque todos os parques infantís sexan seguros, garantindo a instalación de medidas de protección, especialmente naqueles parques que están próximos a estradas

- Melloraremos o [parque canino](#) para que os animais dispoñan dun espazo de recreo do que gozar en liberdade e sen provocar molestias á veciñanza. Queremos que en Ribeira teñan tamén cabida os animais de compañía, que contribúen a mellorar a nosa calidade de vida e que, sobre todo, forman tamén parte das nosas familias. Ademais, habilitaremos dúas praias para o seu uso con mascotas.
- Faremos as obras que a veciñanza precise, non grandes mausoleos nin obras faraónicas que nada teñen a ver co que as veciñas e veciños poden ver solucionadas as súas carencias. Para isto, poremos en marcha os [Orzamentos Participativos](#) para que a veciñanza teña voz directa nos orzamentos municipais. Comprometémonos a que a veciñanza poida escoller o destino dunha parte do orzamento municipal que vaia destinado á súa parroquia.
- Asegurarémonos de que o [servizo de alumeado](#) funcione ben, e de que todos os puntos de luz apagados sexan arranxados no menor tempo posible.

No BNG queremos unha **RIBEIRA VERDE** en contraposición co modelo imposto polo Partido Popular, consistente en encher o concello de cemento e céspede artificial.

Un goberno do BNG baseará a súa política medioambiental en dous principios básicos: a preservación e protección do contorno e a súa posta en valor como motor do desenvolvemento local, tanto no ámbito urbano como no rural.

Neste sentido:

- Ampliaremos o Parque de San Roque e elaboraremos un [Plan de Dinamización do Periurbano](#). Neste plan incluírase a mellora do acceso a pé entre o parque e o centro de Ribeira, para que Ribeira teña por fin unha grande área verde onde a veciñanza poida espaxarse e desfrutar do seu tempo de lecer. Asemade, deseñárase programación de actividades ao aire libre e melloraranse as súas infraestruturas (baños públicos, fontes, merendeiros...).
- Darémoslle prioridade á creación de zonas verdes no casco urbano en posibles proxectos que se leven a cabo.

- Melloraremos a rede de abastecemento de auga potable para reducir perdas e promoveremos o aforro de auga, tanto nos fogares como nas instalacións públicas mediante campañas de sensibilización.
- Crearemos o Programa Municipal de compostaxe e horta ecolóxica, para reducir a fracción orgánica do contedor verde e, polo tanto, o recibo do lixo. Ao mesmo tempo, estaremos reutilizando residuos para abonar xardíns públicos e particulares, o cal tamén redundará positivamente nas arcas municipais.
- Estudaremos a localización e o número de contedores de recollida de lixo. Instalaremos illas de reciclaxe (papel, envases, pilas, aceite, roupa) en todas as parroquias para facilitar a recollida de residuos, tanto á veciñanza como á concesionaria.
- Reduciremos o uso de plásticos instando ás empresas que traballan co Concello a seren medioambientalmente responsables.
- Remataremos o saneamento integral do noso concello, establecendo como prioridade a mediación coas administracións competentes para solucionar os problemas xerados coa construción das estacións depuradoras.
- Regularemos e xestionaremos medidas de supresión o minoración dos impactos paisaxísticos e dos riscos para a saúde causados polas liñas de subministro de enerxía eléctrica, soterrando as liñas de media e baixa tensión sempre que sexa posible.
- Promoveremos medidas que tendan a deseucalptizar o Concello de Ribeira. Do mesmo xeito, traballaremos coas comunidades de montes para revitalizalas e faremos que as franxas de protección de núcleos habitados estean limpas para evitar os incendios forestais.

Ben sabemos que Ribeira está situada nun lugar privilexiado, por iso dende o BNG elaboraremos e executaremos un Plan de protección do patrimonio medioambiental, que incluírá medidas para a súa preservación e vixilancia e de restauración e posta en valor ambiental, social e económico.

Ademais, fomentaremos a participación activa dos propietarios e usuarios do Parque Natural na súa planificación, xestión e usos. Buscaremos sempre o óptimo nivel de consenso social na súa xestión, que se logrará con tres instrumentos básicos: información, estratexias de compensación (social e económica) e mediación para afrontar os conflitos.

Nesta liña, crearemos un selo de calidade para os produtos ecolóxicos que saian do Parque Natural. Do mesmo xeito, para que o parque redunde na veciñanza, promoveremos actividades que sexan compatibles co entorno natural e que sexan beneficiosas para as persoas propietarias de terreos en zonas protexidas.

Para o BNG as parroquias son as entidades vertebradoras esenciais do concello, por iso queremos **QUE AS PARROQUIAS CONTEN**. Consideramos que todas elas, e non só as máis poboadas, deben contar coas mesmas oportunidades. Queremos equiparar a zona urbana e a rural en servizos básicos, levando o abastecemento, o saneamento e as comunicacións ao 100% da poboación, implantando illas verdes, mellorando a rede viaria, descentralizando a oferta cultural e deportiva e poñendo en valor e promocionando o seu propio patrimonio.

Así, desenvolveremos todas as medidas que sexan posibles, entre elas:

- Abordaremos o **saneamento integral** de todas as parroquias e dotarémolas de subministro de auga potable.
- Manteremos regularmente o asfaltado, as beirarrúas, os puntos de luz, os parques infantís e as zonas verdes.
- Constituiremos e poremos en marcha os **Consellos Parroquiais**, para escoitarmos directamente a opinión e as necesidades da veciñanza.
- Achegaremos a **información municipal actualizada** a cada parroquia creando paneis informativos verdadeiramente accesibles á veciñanza e libres de censura, como soportes de libre comunicación e expresión.
- Dotaremos de recursos e crearemos, naquelas parroquias onde fose preciso, **casas de cultura, centros sociais, centros polivalentes, servizos de biblioteca, campos de fútbol e polideportivos cubertos**.
- Deslocalizaremos ás parroquias toda a **oferta cultural e deportiva** do concello, de xeito que todas as veciñas e veciños teñan ao seu alcance opcións de ocio variadas.
- Melloraremos as **redes de transporte público** en todas as parroquias, dentro do Plan de Transporte Público de Ribeira, de xeito que as frecuencias sexan axeitadas e as paradas estean ben sinaladas e dispoñan da información necesaria para a mobilidade da veciñanza (liñas, horarios, prezos...).
- Melloraremos os servizos municipais, especialmente o da **recollida de lixo e a limpeza periódica de camiños**.

EQUIPO UNIDO, PLURAL E CON EXPERIENCIA

A candidatura do Bloque foi escollida e aprobada mediante asemblea aberta ao igual que facemos co candidato, co programa ou coa toma de decisións.

As persoas que aquí vedes representan a todas as parroquias, teñen diferentes perfís profesionais e son xente honesta, traballadora e cun alto compromiso ético.

A candidatura ten un equilibrio perfecto no que se mistura xente con ampla experiencia, renovación coa incorporación de persoas independentes e mocidade.

1. Xosé Antonio Vázquez Cobas
2. Luís Antonio Pérez Barral
3. M^a Cruz Rivadulla Márquez
4. Fátima El Gargari Sampedro*
5. Daniel Couto Argibay
6. Silvia Varela Rodríguez
7. Alexandre Ríos Batista
8. Elvira Blanco Pérez
9. Francisco Regueira Somoza*
10. Rosa Ana Pérez Moares*
11. Carlos Lixó Gómez
12. María Gutiérrez Barral
13. Alberte Paz Calo
14. Teresa Prol Castro
15. Vicente Paz Carou
16. Vanesa Casais Rivas*
17. Joel Crujeiras Ces
18. Marta Varela Rodríguez
19. Xabier Vidal Peón
20. M^o do Pilar Sampedro Laranga

21. Xaquín Maño Sanmiguel

Suplentes

22. Isabel Sampedro Romay*

23. Domingo Casais Gude*

24. Dores Vidal Peón

25. Federico Real Alonso

26. Ánxela Suarez Millán*

27. Xosé Antón Parada Fernández

* independente

